

სსრ კავშირის ჩემპიონატი

18 მაისს შედგა სსრ კავშირის საფეხბურთო ჩემპიონატის X ტურის მატჩები.

„დინამო“ (თბილისი) – „არარატი“ (ერევანი) 1:0 (1:0).

თბილისი. 18 მაისი. ვ. ი. ლენინის სახელობის „დინამოს“ სტადიონი.

„დინამო“: გაბელია, კეტაშვილი, ჩივაძე, ჭეღია, კუდინოვი, რევიშვილი, ცვეიბა, სულაქველიძე, ცაავა, გურული (კაკილაშვილი, 89), შენგელია (კორღალიძე, 46).

„არარატი“: ანტონიანი, კირაკოსიანი, სარქისიანი, ხაჩატრიანი (ვერანიანი, 27), აივაზიანი, ჩილინგარიანი, მარქარიანი, აკოფიანი, ქოჩარიანი, ხაშმანიანი, ქამალიანი (მარკოსიანი, 46).

მსაჯი ა. სპირინი (მოსკოვი).

გაათრთხილეს ჭეღია.

დუბლიორები - 2:1. თბილისელთაგან გოლები გაიტანეს ფანცულაიამ (11-მეტრიანი) და თედევმა.

თბილისის „დინამოს“ გუშინდელ შეხვედრას ერევნის „არარატთან“ ყველანი განსაკუთრებული მღელვარებით ველოდით.

მატჩის პირველი წუთებიდანვე დინამოელებმა დიდი ძალებით შეუტყეს მეტოქის კარს. მათ უკვე მე-3 წუთზე მიეცათ ანგარიშის გახსნის საშუალება. მაგრამ რევიშვილმა და გურულმა ბურთი „ვერ გაიყვეს“ ერევნელთა საჯარიმო მოედანზე დაძაბულობა არ განელებულა. მე-7 წუთზე კი ჩივაძის გამოზომილი პასის შემდეგ ცაავამ ულამაზესი გოლი გაიტანა შორეულ კუთხეში - 1:0.

ამ გოლის შემდეგ თბილისელებმა ტემპს უკლეს. თამაში თითქმის ნახევარი საათის განმავლობაში შუა მიწაში მიმდინარეობდა. ტაიმის მიწურულს მასპინძლებმა კვლავ მძლავრად შეუტყეს სტუმართა კარს. ახალი შტურმის დანყების თვისებურ ნიშნად 35-ე წუთზე რევიშვილის მიერ მეტოქის საჯარიმო მოედნის მარცხენა კუთხეში შესრულებული „სოლო“ იქცა. მან თითქმის ზუსტად გაიმეორე ფინტი, რომელსაც ასე ბრწყინვალედ ასრულებდა უფროსი მიხეილ მესხი. უკან ჩამოიტოვა ორი მცველი და სახიფათოდ ჩააწოდა კარის გასწვრივ. ამას მოჰყვა გურულის შესანიშნავი დრიბლინგი ოთხ მცველს შორის, მაგრამ არაზუსტი დარტყმა. შემდეგ კვიტაშვილის რეიდი და ჩაწოდება გურულის მისამართით (კვლავ არაზუსტი დარტყმა). ბოლო წუთზე ცაავა და შენგელია შეიჭრნენ საჯარიმოში, მაგრამ ცაავამ ვერ შეძლო პასის ზუსტად შესრულება.

მეორე ტაიმი თბილისელებმა კიდევ უფრო ცოცხლად, ტემპურამენტით ჩაატარეს. პირველივე წუთზე ივრიალა სტადიონმა როცა მიწაში ახალგამოსულმა კორღალიძემ თავს უკან დარტყმით ძელს მოახვედრა ბურთი. კორღალიძე ამის

შემდეგაც აქტიურად მოძრაობდა მინდორზე. მას დიდი წვლილი მიუძღვის მეორე ტაიმში ერევნელთა კართან შექმნილ სახიფათო იერიშებში. ერთ-ერთ ასეთ ეპიზოდში კორღალიძემ ბურთი ცივაძეს მიანწოდა. კაპიტანი გასცდა მცველს, და რბილად, მაღალი ტრანექტორიით დაარტყა კარიდან წინ გამოსული ანტონიანის კარში. ბურთი კარის ზედა ზელს გადასცდა.

თბილისელთა მიერ შექმნილი სახიფათო მომენტების ჩამოთვლას აღარ გავაგრძელებთ, ეს შორს წაგვიყვანდა. ერთის თქმა კი აუცილებელია: ჩვენს ფეხბურთელებს გაცილებით მეტი გოლი უნდა გაეტანათ და მატჩიც უფრო დიდი ანგარიშით დამთავრდებოდა, რადგან ჩვენს კართან ფაქტიურად არც ერთი საგოლე მომენტი არ შექმნილა. გაბელიას ჯაფა არ დასდგომია. თბილისელთა თამაში საგრძნობლად გააძლიერეს ტრავმის შემდეგ მწყობრში ჩამდგარმა კეტაშვილმა და კუდინოვმა. ამას ხელი შეუწყო ტაქტიკურმა გადაადგილებებმაც: ცივაძე და ცვეიბა ამჯერად ნახევარდაცვაში გამოდიოდნენ, ცაავა კი კვლავ შეტევის მარჯვენა ფრთაზე მოქმედებდა. ყოველივე ეს ერევნელებთან შეხვედრაში ეფექტური გამოდგა. კიდევ ერთხელ გვინდა აღვნიშნოთ „დინამოს“ ვეტერანთა თამაში: ჩივაძემ, სულაქველიძემ და შენგელიამ კვლავ დიდი მონდომებით, ენერგიულად იბრძოლეს.

ქებას იმსახურებენ „დინამოს“ გულშემატკივრებიც. ისინი კვლავ მოვიდნენ გუნდის გასამხნეველად და მთელი 90 წუთის მანძილზე მხარში ედგნენ მას.

ინტერვიუ მატჩის შემდეგ

გრიგოლ ცაავა. ამ შეხვედრისთვის განსაკუთრებული გულმოდგინებით ვემზადებოდით. ჩვენს გულშემატკივართა წინაშე ვალში ვართ. წარუმატებლად ჩატარებული მატჩების შემდეგ ეს შეხვედრა რომ არ მოგვეყო, არავინ გვაპატიებდა. სწორიც იქნებოდნენ. აქედან გამომდინარე, რა დასამალია, მატჩის წინ საკმაოდ ენერგიულობლით - ძალიან დიდი იყო პასუხისმგებლობის გრძნობა. ვფიქრობ, შევძელით მღელვარების გადალახვა და თამაშიც უკეთესი გამოგვივიდა. ამაში სტადიონზე მოსულ მაყურებელთა მხარდაჭერაც დაგვეხმარა.

რაც შეეხება გატანილ გოლს, ბურთის მიღებამდე ვგრძნობდი, რომ საგოლე მდგომარეობაში ვიყავი და ისიც ვიცოდი, რომ უნდა დამერტყა კარში. ჩივაძემაც არ დააყოვნა, ზუსტად მომანწოდა და ჩანაფიქრიც ზუსტად განვახორციელე.

ზურაბ ფოცხვერია
ლელო 20.05.1987